

ILANGA LEPHASI LOKUFUNDELA PHEZULU NENAL'IBALI

Umnyaka lo iLanga lePhasi lokuFundela Phezulu lizokugidingwa mhlana amalanga ama-4 kuNtaka 2015. Hlanganyela nathi ngelangelo bese ufundele abantwana obaziko indatjana khulukhulu esiyitlolelwe mtloli weSewula Afrika omdembi weendatjana owaziwako, uGcina Mhlophe – *Isipho sikaSisanda* – ebantwaneni obaziko.

IMISEBENZI EMI-5 YELANGA LEPHASI LOKUFUNDELA PHEZULU

1. Fundela abantwana bakho nabanye indatjana ethi, *Isipho sikaSisanda* ekhasini lesi-2 nelesi-3. Zijayeze ukufundela phezulu kambalwa ngaphambi kobana uyifundele abantwana bese ukhumbule ukufaka ukugandelela elizwini lakho lokha nawufundako. Ebantwaneni abancani, ungafisa ukubanjengisa iinthombe lokha nawubacocela indatjana uyenza lula ngokwamagamakho.
2. Vakatihela ku-www.nalibali.org bese urhwatjha abopopayi bemino ababalingisi abaziinkutani endatjaneni, *Isipho sikaSisanda*. Khuthaza abantwana bakho basebenzise abopopayi ukucoca indatjana nanyana ukucoca iindatjana zabo.
3. Khuthaza abantwana bakho kobana bahlathulule indatjana ngokubabawa kobana badwebe nanyana bafake isithombe sengcenywe abayithandako umbala.
4. Sebenzisa iLanga lePhasi lokuFundela Phezulu ukuzama into etja – fundela abantwana nanyana abantu abadala ongazange khewubafundele ngaphambilini phezulu nanyana zama ukufundela abantwana bakho endaweni ehlukeleko kabayijayekeko, njengephageni nanyana lokha nabahlambako!
5. Zenzele amaphosta wakho weLanga lePhasi lokuFundela Phezulu. Akhangise esikolweni sakho, ebulungelweni leencwadi, esiqhemeni sokufundelana nanyana endaweni yokuthandazela ukwenza isilemukiso ngokuqakatheka kwelangeli.

UNGAZIBANDAKANYA BUNJANI

Vakatihela ku-www.nalibali.org nanyana ku-www.nalibali.mobi ukufaka umndenakho, iinqhema zokufundelana nanyana isikolo bese uyasiza ukwenza iLanga lePhasi lokuFundela Phezulu leli libemgidi omkhulu eSewula Afrika!

IINZUZO EZIBU-8 ZOKUFUNDELA PHEZULU!


Ukufundela abantwana bakho phezulu ku/kw:

- batjengisa kobana unegugu leencwadi nokufunda.
- kunikela izinto ongakhuluma ngazo.
- akha ukuzwana phakathi kwenu.
- benza babenelemuko lokufunda njengomsebenzi owanelisako.
- bakhuthaza kobana bafunde ukuzifundela ngokwabo begodu bahlale bafunda.
- batjengisa kobana sifunda njani nokobana iincwadi zisebenza njani.
- banikela ithuba lokobana bathabele iindatjana ezisezingeni elingaphezu kwekghono labo lokufunda.
- thuthukisa ilwazimagama nekgghono lelimi.

THUMBA!

Ngokuzibophelela ukufundela abantwana abaseduze nawe phezulu, uzokuba nethuba lokuzithumbela amathikithi amabili wokukuhlonipha wekhambo lekhayapha ngeemfiselakuhle ze-South African Airways!

Mayelana nemiGomo nemiBandela vakatihela ku-www.nalibali.org



ISIPHO SIKASISANDA

Umtloli nguGcina Mhlophe

Itjhugululwe nguNomsa Mtsweni

Iinthombe ngu Jiggs Snaddon-Wood

Ngamalanga lokha uSisanda oneminyaka ebunane nakafika ekhaya abuya esikolweni, uhlubula ijini fomu yakhe ambathe izambatho zekhaya, adle ukudla kwakhe kwemini bese uyokudlala umrabaraba nobamkhulwakhe. Bebezwa ubumnandi lokha nabadlulisa "iinkomo" zabo babhoda ibhodo kangangobana uSisanda akasafuni ukulisa. Kodwana ubamkhulwakhe uyamkhumbuza bonyana uthe ufuna ukuba mphathibhanga ngelinye ilanga lokha nasele akhulile.

"Uzakwenza bunjani lokho nangabe awuyi esikolweni esiphakemeko?" kutjho ubamkhulu enza ihlaya.



USisanda ahleke. "Ngizokuya esikolweni esiphakemeko neyunivesithi. Kungebangelo ngisebenza ngamandla kangaka esikolweni!"

USisanda mude kuneminyaka yakhe – ufuze uyise. Ubuso bakhe oburonjwana nokumomotheka kwakhe okuhle lifuzo likanina. Ababelethi bakhe bobabili bavuka ekuseni ngamalanga bayokusebenza esithamelweni seembandana esiseduze. Ngesikhathi uSisanda nabangani bakhe bathoma esikolweni, kungena iimbhesi ezizele iimvakatjhi abafuna ukuzokubona iimbandana ezihle ze-Afrika.

Ngelanga lakhe lamabeletho eladlulako, uSisanda waphatheka ngokukhethekileko – ababelethi bakhe bamtholela imvumo yokobana enzele umgidi wakhe wamabeletho esithamelweni seembandana. Iindlulamithi zesithamelweni bezimangele kobana kwenzekani ngesiqhema sabantu abanengi kangaka. Zalula iintamo zazo ezide ukuze zibone kuhle umgidi

begodu zabonakala sengathi zifuna nekhekhe lamabeletho! USisanda uyazithanda iindlulamithi. Zoke iimbandana bezikhethekile kuye, kodwana ziindlulamithi ezizithobileko azithanda khulu ngehlizwakhe. Angathatha ilanga loke abukelana nazo.

Ngomunye ulesihlanu, ubaba kaSisanda wabuya emsebenzini frurhu. Khabe abonakala angakathabi nakancani.

"Kwenzenjani, baba?" kubuza uSisanda.

"Namhlanjesi umtjhitjhi weenyosi utinyele indlulamithi esikazi," kuhlathulula uyise kaSisanda. "Ihlokwakhe beyivuvuke khulu ngonobangela wokutinyelwa amehlwakhe amahle bekavalekile. Sizame koke okusemandleni ukuyisiza, kodwana akhenge kusebenze, – yase iyafa. Okubhulungu ukudlula koke kukobana inekonyana elisadinga ithhogomelo layo."

"Bababel!" kutjho uSisanda athoma ukulila. "Ngifisa ngathi ngabe kunento engingayenza. Ngidlumbana bonyana umntwana wendlulamithi utshwenyeke njengami nje."

USisanda walila, walila. Unina wazama ukumthulisa. Unina wabe wamfundela iindatjana ngesikhathi sokulala ukumsiza bonyana akhohlwe bona umzwela ubhulungu kangangani umntwana wendlulamithi. Kusesenjalo, uSisanda wabanjwa buthongo walaliswa liphimbo elipholileko likanina.

Ngelanga elilandelako ekuseni uSisanda wavuka nombono!

"Ngingakhamba nani emsebenzini namhlanjesi?" wabuza kuyise. "Ngingesipho somntwana wendlulamithi."

Ababelethi bakhe baqalana, bamomotheka base



Ukubonakalisa ikghono labentwana ngokucoca nokufunda iindatjana

bathi, "Iye, kulungile, ungakhamba nathi."
Kwakulilanga elifuthumeleko kodwana linamafu.

Yoke into esithamelweni yabonakala ithule
ngokungakajayeleki.

"Ngicabanga bonyana ilanga alikahlabi namhlanjesi
ngombana lidanile ngomntwana wendlulamithi,"
kutjho uSisanda.

Indlovu ekulu yaqala umndeni odlulako.
"Mhlamunye iyamangala kobana kubayini
umntazanyana omncani akhamba nababelethi bakhe
emsebenzini," kutjho unina kaSisanda.

USisanda avume ngehloko. "Uzokumangala
nakatholako," uyacabanga.

Bathola umntwana wendlulamithi ajame yedwa.
Alengise intamo yakhe ede namehlwakhe azotho
abonakala anganathabo. USisanda wajama eduze
kwakhe ngendlela akghona ngayo. Wakhupha
ibheganakhe encazana wase ukhupha incwadi.
Ngaleso sikhathi, ababelethi bakhe basamangele,
wathoma wafundela umntwana wendlulamithi
incwadi. Watjhugulula ihlokwakhe waqala ngakuye
wase ulalela kwangathi uzwisisa elinye nelinye igama
elifundwako. Ekuthomeni, ababelethi bakaSisanda
babecabanga bonyana ukufundela indlulamithi
kukwenza into esimanga. kodwana batjhugulula
imikhumbulo lokha nababona bonyana umntwana
wendlulamithi ubukeka anokuthula kangangani –
amehlwankhe alungileko aqale uSisanda.

"Indatjanami imenze wazizwa angcono," uSisanda
wacocela uyisemkhulu lokha nakafika ekhaya.



USisanda esikhathini esinengi ngemva kwamadina
nangeempelaveke bekakhamba ayokuvakatjhela
indlulamithi encani. Ngasosoke isikhathi nakayako,
bekathatha incwadi azomfundela yona. Abangani
ababili abatjhaba bebagaleke babahle nababobabili
ngitjho neenkhambi ezidlulako bezibathatha
iinthombe.

Kancani, kancani indlulamithi encani yakhula,
yabanamandla. Abantu besithamelweni
bebayithogomela kuhle khulu begodu nethando

lomngani wayo omutjha uSisanda belenza
umsebenzi osimanga.

Ngelinye ilanga umphathi wesithamelweni wabawa
uSisanda bonyana athiye umnganakhe omutjha
lo ibizo.

"Ngicabanga bonyana uThokozani ligama elihle,"
kutjho uSisanda.

Ngelanga elilandelako umphathi wesithamelo
wadosela utitjhere kaSisanda umtato. Wamema boke
abafundi betlasi kaSisanda bonyana bazokubona
uThokozani. Indlulamithi ehle besele ikhulule yabayide
begodu yabanamandla eenyangeni ezintathu solo
uSisanda ahlngana nayo.

Ngelanga
lekhambo
lelo, abafundi
bebanga lesi-3
besele bajame
ngerhuluphelo
bonyana iinye
zesithamelo
zivulwe. USisanda
ngokuzikhakhazisa
wadosa woke
umuntu phambili
bonyana baye
kuThokozani.
Abanye abantwana
baqala indlulamithi
ede ngokumangala.
Abanye bagigitheka ngokusaba. Utitjherabo, uKsz
Khanyile, wamane wamomotheka.



"Umnganakho muhle, Sisanda. Ubenomusa khulu
kuye," watjho ngesineke.

"Ngubani ibizo lakhe?" kubuza omunye
wabesanyana.

"NguThokozani," kuphendula uSisanda.

"Ukuthi Thokozani kutjho ukuthi 'ukuthokoza',"
kuhlathulula uKsz Khanyile.

Abantwana bahlala phasi balalela lokha uSisanda
nakabafundela indatjana ayifundela uThokozani
ngelanga lokuthoma abahlangana ngalo.
Umphathi wesithamelo wabathatha iinthombe.
Nezinye iimvakatjhi ezazidlula ngendlela nazo
zabathatha iinthombe. Ngitjho nomthathiinthombe
wephephandaba naye wabathatha. Umthathiinthombe
wathembisa bonyana isithombe sabo sizakuba
sephepheni msinyana. Woke umuntu wawahla
izandla.

Ukufundela umngani ngomngqopho wokumpholisa.
Sisipho esimangazako lesi!

Ukubonakalisa ikghono labentwana ngokucoca
nokufunda iindatjana

YENZA IBHEJI!



1. Sika phezu komuda wamachatjhezana abovu ukhuphe ibheji.
2. Faka isithombe umbala.
3. Sika indulungu elingana nebheji ekhadibhodini elimatsikana, isibonelo, ibhokisi lesirili.
4. Sebenzisa idlhu ukunamathisela ibheji phezu kwekhadibhodi.
5. Sebenzisa itheyiphu enamathelako nanyana itheyiphu yemaski ukunamathisela isiqobotjhelo ngemva kwebheji. Nanyana yenza imbobo phezulu bese uthungelela ivolo nanyana ufake umtiya embotjeni uzokwazi ukuyihaga entanyeni yakho.
6. Thabela ukufaka ibheji yakho lokha nawufundako bese ulalele neenolwana ngeLanga lokuFundela Phezulu lePhasi.

Sibawa usithumele iinthombe zabentwana bakho kunye neembheji zabo zokufundela phezulu. Imeyilela ku-info@nalibali.org namkha zipose ku-Facebook!

MAYELANA NENAL'IBALI

INal'ibali (okuligama lesiXhosa elithi "nasi indaba") lijima lesitjhaba lokuzithabisa ngokufunda ukuze kukhanye ikghono labentwana ngokucoca indatjana nokufunda. Abentwana abangenelele khulu eendatjaneni ezicocwa kuhle nakamandi – begodu ngelimi abalizwisisako – bayakhuthazeka babenomdlandla wokufunda ukuzifundela ngokwabo. Ukufunda okunjengalokho okuthabisako kuyindlela eyipumelelo yokuthuthukisa ikghono lokufunda nokutlola.

INal'ibali ikhuthazwa yi-PRAESA (i-Project for the Study of Alternative Education in South Africa), i-Times Media kunye nesibalo esikhulako sabasebenzisani. Ngokusebenzisana nabeluleki nemiphakathi ethembekileko, iintlabha zokufunda, iinhlango zokufunda nokutlola namavolontiya weminyaka yoke yobudala, kunye nejima labosondaba elihlahlambileko, iNal'ibali isiza ukudephisa ijayelo lokufunda nokutlola kobana libe sisekelo sepilo yangamalanga yeSewula Afrika.

Khuluma nathi. Ukuthola ilwazi elingezelelweko vakatjhela ku-www.nalibali.org, www.nalibali.mobi namkha imeyilele ku-info@nalibali.org. Ungasithola godu ku-Facebook naku-Twitter: @nalibaliSA



Ithoma ngendatjana...